



JAVNA USTANOVA KANTONA SARAJEVO
ZAVOD ZA ZDRAVSTVENU ZAŠTITU STUDENATA
UNIVERZITETA U SARAJEVU
UPRAVNI ODBOR

Broj: 01-01- 119 /2026
Sarajevo, 19.01.2026. godine

SKUPŠTINA KANTONA SARAJEVO
Ul. Reisa Džemaludina Čauševića 1
71000 Sarajevo

253
Bosna i Hercegovina
Federacija Bosne i Hercegovine
KANTON SARAJEVO

PRIMLJENO:		19-01-2026	Broj priloga
Organizaciona jedinica	Kategorija	Redni broj	
01	04	57021-65	

**Predmet: Odgovor na zastupničku inicijativu, dostavlja se,
veza Vaš akt broj 01-04-57021-34/25, od 18.12.2026. godine**

Poštovani,

Upravni odbor Javne ustanove Kantona Sarajevo Zavod za zdravstvenu zaštitu studenata Univerziteta u Sarajevu, razmatrajući dostavljenu zastupničku inicijativu u vezi sa statusnim promjenama zdravstvenih ustanova, *daje negativno mišljenje na predloženu reformu u trenutnom obliku, većinskom odlukom članica Upravnog odbora.*

Upravni odbor podržava reformske procese u zdravstvenom sistemu Kantona Sarajevo koji imaju za cilj unapređenje dostupnosti, kvaliteta i efikasnosti zdravstvene zaštite, ali smatra da takve reforme moraju biti zasnovane na stručnoj, zakonskoj i sistemskoj analizi, te da prilikom donošenja odluka mora biti obezbjeđen kontinuitet zdravstvene zaštite pacijenata. Reforma zdravstvenog sektora, posebno u dijelu statusnih promjena zdravstvenih ustanova, zahtijeva jasno definisane modele pružanja zdravstvenih usluga, definisan prelazni period, usklađenost sa važećim zakonodavstvom, te uključivanje svih relevantnih institucionalnih aktera. Članom 65. Zakona o zdravstvenoj zaštiti Federacije BiH propisana je nadležnost Upravnog odbora da odlučuje o pitanjima obavljanja djelatnosti ustanove, donošenju planskih dokumenata i nadzoru nad poslovanjem. U tom smislu, Upravni odbor smatra da u pripremi i utvrđivanju predložene odluke nije bio konsultovan niti je imao uvid u analize koje bi se odnosile na organizacijske, pravne i sistemske posljedice planirane reforme, što otvara pitanje proceduralne pravilnosti procesa.

JU KS Zavod za zdravstvenu zaštitu studenata UNSA pruža zdravstvenu zaštitu specifičnoj, homogeno definisanoj i epidemiološki prepoznatljivoj kategoriji stanovništva – studentima Univerziteta u Sarajevu. Zdravstvena zaštita studenata se u okviru Zavoda pruža objedinjeno, u jednoj ustanovi, kroz kontinuiran i integrisan pristup koji odgovara specifičnim potrebama studentske populacije i koji je kroz višedecenijsku praksu izgrađen kao održiv model. Predložena odluka o brisanju Zavoda i njegovom pripajanju novoformiranoj ustanovi ne definiše koje djelatnosti će se u budućnosti obavljati u okviru organizacione jedinice za studente, niti da li će sve postojeće usluge ostati dostupne u okviru nove ustanove. Time ostaje otvoreno pitanje obima zdravstvenih usluga koje će biti pružane studentima, a što uključuje i pitanje gdje će se ostvarivati usluge koje eventualno neće biti zadržane u novoj organizacionoj strukturi, te da li će teret njihovog pružanja preuzeti Dom zdravlja Kantona Sarajevo. Upravni odbor smatra da fragmentacija zdravstvene zaštite studenata kroz više ustanova može dovesti do smanjenja dostupnosti i kontinuiteta zdravstvene zaštite, kao i do dodatnog opterećenja primarnog zdravstvenog nivoa.

Dodatno, iako odluka nominalno predviđa nastavak obavljanja djelatnosti kroz posebne organizacione jedinice u okviru novog zavoda, naziv ustanove ne sadrži elemente koji upućuju na zdravstvenu zaštitu studenata. Time se otvara pitanje vidljivosti i dostupnosti zdravstvenih usluga studentima kao krajnjim korisnicima, te se može stvoriti pravna i praktična neizvjesnost u pogledu toga gdje i na koji način studenti ostvaruju svoje pravo na zdravstvenu zaštitu. Upravni odbor smatra da je jasno označavanje zdravstvenih ustanova i njihove ciljane populacije ključno u smislu zdravstvene politike, planiranja i epidemiološkog nadzora, te da nepostojanje takvog naziva u predloženoj odluci može dovesti do otežane identifikacije i korištenja zdravstvenih usluga od strane studenata.


Otvorena ostaju i pitanja medicinske dokumentacije i zdravstvenih kartona studenata, njihove pohrane i korištenja, kao i pitanja prelaznog perioda i pravnog kontinuiteta. Također, pitanje statusa zaposlenih nije precizno razrađeno, a njihovo raspoređivanje u druge zdravstvene ustanove zahtijeva pravni osnov, jasne kriterije i procjenu kapaciteta ustanova koje bi trebalo da ih preuzimaju. Reforma zdravstvenih ustanova, u smislu Zakona o zdravstvenoj zaštiti, Zakona o zdravstvenom osiguranju i Zakona o radu, zahtijeva fazni pristup i uvezivanje između ustanova, kako bi se izbjegli rizici od pravne nesigurnosti, prekida u pružanju usluga ili otežanog funkcionisanja sistema. Potencijalno odlaganje upisa statusne promjene pred nadležnim sudom dodatno može izazvati poremećaje u poslovanju, što se mora izbjeći.

Upravni odbor podržava reformske procese u zdravstvenom sistemu, ali smatra da predložena odluka o statusnoj promjeni u ovakvom obliku ostavlja otvorenim ključna sistemska, pravna i organizaciona pitanja. Slijedom iznesenog, Upravni odbor u ovom trenutku ne može dati pozitivno mišljenje na reformu u predloženoj formi.

S poštovanjem,



Predsjednica Upravnog odbora



Dostaviti:

- *Naslovu*
- *a/a*